

Qalam

KDN 186

148, Jamādi al-Akhir, 1382, November 1962, 60 sen

Hukum perceraian di Singapura

Dalam undang-undang ((*Muslim Ordinance* (bilangan 25 tahun 1957) Singapura)) yang telah diluluskan oleh kerajaan Singapura dan berjalan kuat kuasanya hingga hari ini, di dalam Seksyen (3) 12 ada menyebut bahawa mana-mana kadi tidak dibenarkan mendaftarkan sebarang cerai melainkan ia telah puas hati bahawa kedua-dua pihak telah bersetuju. Tetapi mengikut Seksyen (4) 12 larangan itu tidak termasuk perceraian yang telah diputuskan oleh Mahkamah Syariah. Maksudnya bahawa sebarang perceraian yang tidak ada persetujuan di antara kedua pihak hendaklah dihadapkan kepada Mahkamah Syariah. Ini ada sebut dalam Seksyen 21. Ini sama dengan Seksyen 35 dalam pertadbiran *Muslim Law Ordinance*.

Undang-undang ini pada mulanya diadakan ialah kerana perasaan tidak puas hati di atas langkah-langkah setengah kadi-kadi yang tidak bergaji, terus sahaja membuat sesuatu perceraian dengan tidak usul periksa dan menjadikan angka-angka bercerai di dalam negeri Singapura meliputi kepada 60 atau 70 peratus daripada jumlah perkahwinan. Sebab itu timbul perasaan tidak puas hati itu dan dengannya menghendaki supaya kerajaan mengadakan satu Rang Undang-undang kerananya.

Rang Undang-undang ini lalu diadakan dan dikemukakan kepada kerajaan Singapura untuk disahkan. Rang Undang-undang itu diterbitkan di dalam bahasa Inggeris yang menjadikan alim ulama kita di Singapura lengah. Dengan itu maka Rang Undang-undang tahun 1957 itu pun disahkan dan berjalanlah kuat kuasanya hingga hari ini.

Tetapi apabila keadaan dan masa berjalan dan kuat kuasanya dijalankan oleh kadi-kadi Singapura serta oleh Mahkamah Syariah maka bahrulah alim ulama menyedari bahawa Rang Undang-undang itu kalau dijalankan boleh jadi bertentangan dengan agama, sekalipun tujuannya tidak dimaksud demikian, ini terbukti daripada beberapa kejadian di dalam perceraian. Dikhabarkan bahawa seorang suami telah pun menceraikan isterinya. Sedang lafaz cerai yang dikeluarkan oleh suami kepada isterinya itu sehinggakan di dalam bermain sekalipun adalah gugur talaknya. Tetapi khabarnya pihak kadi tidak mau menerima ceraian itu dan tidak mau mendaftarkannya sekalipun mereka mengetahui bahawa cerai itu telah gugur mengikut syarak.

Tetapi apa yang terjadi, dikatakan, bahawa kalau kadi belum berpuas hati bahawa kedua-dua pihak bersetuju maka tidaklah cerai itu diterima bahkan cerai yang telah sah itu tidak pula boleh didaftarkan sekiranya pihak perempuan belum mau menerima atau bersetuju dengan cerai itu.

Dengan cara ini maka tidaklah ada kuat kuasa lagi bagi suami untuk menceraikan isterinya, dan yang demikian itu dipandang dari segi Islam adalah bertentangan dengan dasar dan ¹kelualasan yang diluluskannya oleh Islam. Hanya agama lain sahaja yang berbuat demikian – tidak dari

¹ Perkataan sebenar ialah keluasan.

hukum Islam.

Sekiranya tujuan ini dikehendaki jangan ada berlaku perkara-perkara sewenang-wenang terhadap wanita maka janganlah pula hendaknya hak suami itu diambil dan dirampas.

Dengan sebab itu adalah sangat molek kalau dapat dengan secara cepat kerajaan mengadakan pindaan dalam perkara yang tersebut.

Pindaan itu hendaklah diadakan dengan menyatakan bahawa sebarang perceraian yang telah berlaku hendaklah didaftarkan dan diberi surat pendaftarannya tetapi kadi, bagi pihak perempuan diberi hak menyaman suaminya dalam perkara-perkara yang mengenai belanja atau seumpamanya yang menjadi tuntutannya.

Maksudnya sebarang perceraian yang sudah dijatuhkan oleh seorang suami terhadap isterinya hendaklah didaftarkan dan jika ada sangkut pautnya hendaklah diberi hak baginya untuk menyaman atau menuntut suami menunaikannya mengikut undang-undang Islam. Tuntutan itu hendaklah dikuatkuasakan haknya dengan undang-undang negeri.

Sekiranya perceraian belum terjadi, maka kewajipan kadi atau pegawai-pegawai kadi mencari jalan supaya ada perdamaian di antara keduanya – ertiya badan penasihat di dalam perkara yang seperti ini, untuk mendamaikan, wajib berusaha supaya jangan terjadi atau berlaku perceraian itu. Dengan cara ini sahajalah kita rasa orang ramai tidak berpuas hati sebab hak-hak agamanya terkawal.

* * *

Umat Islam Singapura dan Piagam Wanita

Kerajaan Singapura telah mengeluarkan suatu isytihar pada 10 Oktober yang lalu menegaskan bahawa kerajaan

tidak mengganggu hal ehwal orang-orang Islam Singapura, dan kerajaan adalah sentiasa menghormati kepercayaan dan pegangan mereka terhadap agamanya. Kecuali atas perkara-perkara yang perlu diambil nasihat lebih dulu dari wakil-wakil orang Islam sendiri. (Kenyataan kerajaan yang tersiar itu ada disiarkan di dalam Qalam keluaran ini).

Kerajaan telah menyatakan bahawa kecaman dan tuduhan atas perjalanan pertadbiran Mahkamah Syariah sudah menyeleweng daripada asas agama yang sebenar itu adalah timbul dari salah faham orang ramai di dalam mengertikan pertadbiran undang-undang Islam Singapura.

Apa yang telah terjadi dan berlaku adalah terang dengan nyata bahawa orang-orang Islam Singapura, melihat daripada apa yang berlaku, berperasaan tidak senang di dalam perkara-perkara cerai (lihat rencana di atas) dan perkara kahwin lebih dari satu. Orang-orang Islam terasa bahawa tepat atau dengan tidak tepat bahawa orang-orang Islam Singapura adalah terlebih di dalam Piagam Wanita yang dikuatkuasakan pada tahun 1961 itu. Kerana itulah umat Islam Singapura menunjukkan rasa tidak puas hatinya terhadap kepada peraturan-peraturan yang dijalankan yang dipandang mereka sangat bertentangan dengan pengertian agama Islam yang dianut mereka.

Di dalam kenyataan kerajaan Singapura itu menyatakan bahawa tidak semuanya Piagam Wanita yang dikenakan kepada umat Islam padahal kalau tidak khilaf Menteri Kehakiman sendiri menyatakan dalam masa mengemukakan Rang Undang-undang ini, orang-orang Islam tidak akan dikenakan apa-apa di atasnya.

Tetapi kenyataan yang baharu ini menunjukkan bahawa orang-orang Islam adalah terlibat dalam ((Piagam Wanita)) di dalam perkara-perkara fasal (i), Fasal (7), (8) (10) dan (ii). Dengan ini orang tentu akan bertanya apakah ertiya